



*Kata Alu-Aluan*  
PENGARAH PENDIDIKAN NEGERI JOHOR

Assalamualaikum Warahmatullahi Wabarakatuh,  
Selamat Sejahtera,  
Salam 1Malaysia,  
Salam Muafakat Johor.

Bersyukur saya ke hadrat Allah SWT kerana dengan izin-Nya, saya diberikan kesempatan untuk merakamkan Kata Alu-aluan dalam majalah sekolah ini bagi keluaran tahun 2016. Syabas dan tahniah kepada Sidang Redaksi dan warga sekolah kerana berjaya menerbitkan majalah sekolah pada tahun ini.

Bidang pendidikan di negara kita akan terus berkembang maju dan mengalami proses transformasi. Pelan Pembangunan Pendidikan Malaysia (PPPM) 2013 – 2025 merupakan suatu manifestasi kepada proses transformasi yang direncana bagi meleddakan pembangunan pendidikan di negara ini. Proses ini bagi menterjemah kepemimpinan, pengurusan, pembelajaran dan pengembangan potensi ilmu, kemahiran serta kepakaran abad ke-21 perlu dijanakan seawal di peringkat sekolah lagi. Menerusi proses pembangunan potensi yang dirancang secara berterusan dan dilestarikan penambahbaikan, modal insan kelas pertama dan bertaraf *global player* akan dapat dihasilkan. Inilah antara aspirasi pendidikan negeri Johor yang diterjemahkan menerusi gerak kerja *Johor Showcase*.

Pelbagai idea dan pemikiran baharu telah dan sentiasa dijelmakan di peringkat sekolah bagi memantapkan sistem yang telah sedia diimplementasikan secara lestari. Pelbagai inisiatif dihasilkan dan dipacu dengan lebih pantas agar memberi kesan besar kepada warga sekolah, komuniti dan negara. Anjakan pemikiran yang menjangkau masa hadapan dan merentas pelbagai disiplin keilmuan serta kemahiran itu perlu digarap secara mapan agar kepimpinan sekolah dan guru sentiasa komited bagi menyedia dan melahirkan modal insan yang mampu menghadapi cabaran global dan menjadi *global player* yang dinamik.

Saya amat yakin bahawa penerbitan majalah sekolah pada tahun ini merupakan manifestasi kolaboratif, komitmen serta kreativiti dan pemikiran kritis semua pihak iaitu murid, guru dan barisan kepimpinan sekolah yang disokong pula oleh pihak ibu bapa serta komuniti. Inilah sistem jalinan dan jaringan secara menyeluruh yang perlu dikekalkan.

Akhir kata, marilah kita bersama-sama membangunkan pendidikan negeri Johor agar sentiasa cemerlang dan gemilang sederap dengan slogan '*Johor Showcase*'.

Sekian, terima kasih.

(HAJI SHAHARUDIN BIN SHARIF)  
Pengarah Pendidikan Negeri Johor